



Senin, 09 Agustus 2021

Ogen: Yesaya 40:31



Gegeh IpelimbaruiNa



Kegagalan tidak akan pernah menyusul jika tekad untuk sukses cukup kuat. Enda sada kata mutiara si mpersingeti kita ula kal kita sempat putus asa ibas kerina dampar kegeluhen. Megati labo kita arusna gagal tapi la sabar kita mentasi tantangan e, banci saja iperluken sepuluh tangga guna ndatken sura-surata tapi ibas tangga pewaluhken enggo kita ngelabuh, dungna ulihna la bagi sinisuraken. Tentuna ibas proses nangkihi tangga enda la bias ngandalken gegeh ras semangatta tapi perlu strategi si mehuli.

Ibas renungenta paksa enda Jesaya nehken kata pergegeh man banta maka kalak siernalem kempak Tuhan tetap ipelimbarui gegehna. Ertina manusia tuhu erbatas la saja gegehna tapi kesempatenna pe, umur geluhna. Alu bage ia tuhu-tuhu arus tetap ngandalken Tuhan. Gambaren siituriken Jesaya eme desken rajawali kabang reh ganjangna, ngasup ia nembus udara simbergeh janah kabang meganjang labo dahin si melukah, anak rajawali mentasi proses erlajar si luar biasa, tangtangna ia naper erlajar kabang iugur indungna asarna. Emaka gelah la ndabuh ku batu-batu erjuang me anak anakna e kabang, megegeh kabengna erkiteken terlatih. Ia kabang meganjang guna strategi nangkap burunna, idauh-dauh nari iidahna burunna janah alu pedas ia kabang nusur guna nangkapca. Bagem e ia erjuang nggeluh , adi ibas badai itengah lawit pe ia me si ngasupna ertahan ngadapi erbage kesuliten e.

Kiam la ngelabuh, erdalan la iakapna latih. Bagenda me gambaren kalak siernalem man Tuhan. Kuga kita ibas perdalanan ras pengalamen geluhta? Banci saja pernah nge kita ngelabuh, ibas kekotenta ipegegehiNa, ibas kearun ateta iapuliNa, ibas keru gegehna ipelimbaruiNa. Perlu latihan janah tetaplah kita ernalem man baNa simada geluh enda.